

SELangkah: Lebih 20,000 premis daftar, rekod 1.039 juta pengunjung

SelangorKini.my

13 Mei 2020

by Afix Redzuan

SHAH ALAM, 13 MEI: Sebanyak 21,064 premis di seluruh negeri berdaftar di portal Langkah Masuk Dengan Selamat (SELangkah) sehingga 11 Mei lalu, bagi menjejak jangkitan Covid-19.

EXCO Kesihatan Dr Siti Mariah Mahmud berkata sistem yang diperkenalkan pada 5 Mei lalu turut merekodkan 1.039 juta pengunjung ke premis perniagaan.

“Selangor yakin inisiatif ini boleh menjadi sumber digital untuk meningkatkan kecekapan pengumpulan data, menjimatkan masa serta mengurangkan risiko jangkitan melalui perkongsian alat tulis jika kehadiran direkodkan secara manual,” katanya ketika sidang media di Bangunan Setiausaha Kerajaan Negeri hari ini.

SELangkah yang dikendalikan Pernerbadanan Menteri Besar menggunakan konsep asas kawalan automatik bagi pendaftaran individu yang memasuki sesuatu premis dengan mudah dan pantas.

Dengan hanya mengimbas kod QR menggunakan telefon bimbit dan mendaftar maklumat, pengesanan kontak dapat dibuat jika terdapat kes Covid-19 di sesebuah premis.

Akses sistem tersebut turut dikongsi bersama Jabatan Kesihatan Negeri Selangor, agensi kerajaan dan pihak berkuasa tempatan.

© Copyright 2019 - Developed for the People of Selangor

Source: <https://selangorkini.my/2020/05/selangkah-lebih-20000-premis-daftar-rekod-1-039-juta-pengunjung/>